

Акафист святой благоверной великой княгине- инокине Анне Кашинской

Празднование 25 (12) июня,

Кондак 1

Избранной и предивней угоднице Христове, скорой помощнице и молитвеннице нашей, похвальная воспеваем ти, о нас пред Христом Богом предстательнице. Ты же яко имущая велие дерзновение ко Господу, молися, да избавит от бед и скорбей ны зовущия:

Радуйся, святая благоверная княгине, преподобная мати Анно.

Икос 1

Ангелов Творец честную отрасль благочестиваго корене благоверных российских князей избра ты во образ всем, сияющую верою, любовью, чистотою, да вси, зряще твое богоугодное житие, со благоговением и радостию глаголют ти сице:

Радуйся, яко от младенчества благодати Божия исполнилася еси; радуйся, яко в житии твоём добродетельми многими просветилася еси. Радуйся, правило веры и благочестия; радуйся, образе кротости и смирения. Радуйся, светило любви и воздержания. Радуйся, даров Святаго Духа честное вместилище. Радуйся, скорбных утешение; радуйся, княгинь и инокинь Российских похваление. Радуйся, живущих в мире тихое пристанище; радуйся, благочестивых родителей утешение. Радуйся, градов Твери и Кашина и всея земли наша украшение;

радуйся, ныне с лики ангельскими на небесех Владыце всех предстоящая.

Радуйся, святая благоверная княгине, преподобная мати Анно.

Кондак 2

Провидев Господь ангелоподобное житие твое, яко святое имя Его прославиши, и якоже заповеда святыи апостол, бдительна, святолепна, целомудрена, здрава верою, любовию и терпением пребудеши, от юности твоея призва тя пети Ему: Аллилуия.

Икос 2

Разум небесный тебе даровася, богоизбранная отроковице, непрестанно помышляти о небесных и боголюбивем крове благоверных родителей твоих. Сего ради прими от нас похвалы сия:

Радуйся, родителей благочестивых плод благословенный бывшая; радуйся, добродетели и благочестие их унаследовавшая. Радуйся, благочестию и молитве от них наученная; радуйся, чтению Божественных Писаний навывшая. Радуйся, жития святых и поучения их возлюбившая; радуйся, от святителей ростовских научение приемшая. Радуйся, с родители твоими благословению и наставлению иереев Господних присно внимавшая; радуйся, аки крин благовонный во Отечестве твоём процветшая. Радуйся, от младых ногтей твоих страх Божий имевшая; радуйся, от юности твоея горняя мудрствовавшая. Радуйся, сим путь спасения нам показавшая; радуйся, непоколебимое на Господа Иисуса упование неизменно сохранявшая.

Радуйся, святая благоверная княгине, преподобная мати Анно.

Кондак 3

Сила Вышняго от юности твоя воистину осеняще ты, и храняще, и возбуждаше на молитвы, пощение и милосердие, во еже благочестивым предком твоим подражати и Господеви воспевати: Аллилуия.

Икос 3

Имущи благочестивыя родители, прилежала еси богоугодному житию, благодатию Божиею во всяцем деле блазе всегда подкрепляема сущи. Темже дивящися таковому от юности твоя рачению, со умилением зовем ти:

Радуйся, яко Господь Бог благоизволи от юности освятити тя; радуйся, яко Богатый милостию обогати тя благодатию Своею. Радуйся, яко Господь исполни тя страха Божия, премудрости и разума; радуйся, яко от младенчества Господеви прилепилася еси. Радуйся, яко со страхом Божиим и усердием храму Божию и службам церковным присно прилежала еси; радуйся, яко и в доме неусыпно правило молитвенное исправляла еси. Радуйся, яко всякое дело твое с молитвою сопрягашеся; радуйся, яко труд твой благодарением Богу скончавашеся. Радуйся, чистоты душевныя и телесныя хранительнице; радуйся, неустанным благотворением и милостынями верным скорая помощнице. Радуйся, девам чистым премудрая устроительнице; радуйся, чадом нашим добрая учительнице.

Радуйся, святая благоверная княгине, преподобная мати Анно.

Кондак 4

Буря бед и напастей утесняше тогда Отечество наше и веру православную, и вси бедствоваху от нашествия иноплеменник и междоусобных брани. Ты же, юнице, сердцем чистая, во уединении сущи, изливала еси в молитве пред Господом душу твою, ангельскую песнь вопиюще: Аллилуия.

Икос 4

Слышавши боголюбивая княгиня Ксения, мати святого князя Тверскаго Михаила, о благочестии твоём, княгине Анно, рече послом своим: слышах, яко есть у ростовскаго князя дщи зело добродетельна, премудра же и прекрасна: сию убо, Божиим изволением, видети желаю в супружестве за сыном моим. И абие по благодати Божией исполнися желание сердца ея, да тобою Бог прославится и да вси воспевают тебе:

Радуйся, невеста, промыслом Божиим предуказанная; радуйся, голубице чистая и непорочная сердцем. Радуйся, мудрая евангельская дева, во свете веры и дел благих ходившая: Радуйся, яко невозвратным путем по заповедем Владыки твоего шествовала еси; радуйся, яко за преславныя добродетели твоя вниши в чертог Царя Небеснаго сподобилася еси; радуйся, всем женам российским похвало и утверждение. Радуйся, чистотою твоею всем родом твердое научение; радуйся, яко согласие супругов, по молитвам к тебе, подавала еси. Радуйся, неисповедимыми судьбами Божиими от Него прославленная. Радуйся, новая чудеса и знамения много чтущим тя явившая. Радуйся, яко царя

боговенчанного и отрасли дома его на поклонение
мощем твоим подвигла еси; радуйся, яко и сердца
верных к почитанию воспрославлению твоему
привлекла еси.

Радуйся, святая благоверная княгине, преподобная
мати Анно.

Кондак 5

Яко светлая звезда, богомудрая невеста, присными
твоими сопровождаема, с великою славою во град
Тверь во храм Спаса нашего прибыла еси, князи же и
народи, велелепно сретающе тя, радовахуся о тебе,
вопиюще Богу: Аллилуия.

Икос 5

Видевши тя вельможи, клирицы и мирстии людие
богоспасаемого града Твери, на брак честный с
возлюбленным князем их Михаилом притекшую,
изыдоша в сретение твое и вопияху ти, глаголюще:

Радуйся, от Ливана невесто, во образ единения
Христа и Церкви сочетатися браком со князем нашим
грядущая; радуйся, чистая голубице, пришествием
твоим мир с Богом и в человецех благоволение
знаменующая. Радуйся, от Бога князю нашему с
делех управления помощнице уготованная; радуйся,
за невинныя и люте страждущыя ходатаице,
промыслом Божиим предуказанная. Радуйся, о
нуждах и потребах наших пещися от Бога
поставленная; радуйся, сокровище матерняго
попечения, от Господа нам данное. Радуйся, светило
милосердия, над градом нашим восходящее; радуйся,
звезда утренняя, присно радость нам возвещающая.
Радуйся, облаче всесветлый, дождь любве и помощи

всем достойным твоего заступления искапати обещаешь; радуйся, во образ женам христианским свыше пронареченная. Радуйся, вдовицам и сирым покрове, провидением посланный; радуйся, юным девам и женам прибежище и укрепление.

Радуйся, святая благоверная княгине, преподобная мати Анно.

Кондак 6

Проповедуют о богоугодном житии твоём, блаженная мати, в супружестве и княжении, добродетели твоя: велие благочестие, смиренномудрие, милосердие, истинная матерняя любви ко всем, поющим о тебе Богу: Аллилуия.

Икос 6

Возсия богоугодное житие твое, яко красная заря, призывающая всех на богоугождение на делание свое со усердием, да вси последующе ти зовут:

Радуйся, со князем, супругом твоим, во всяком благочестии и чистоте пожившая; радуйся, и чада твоя во страхе Божии воспитавшая. Радуйся, Церкви Божией благодеевшая и благолепие храмов Божиих любившая: Радуйся, и по кончине твоей любовь многу ко храмам Божиим в душах граждан боголюбивых возжигавшая. Радуйся, яко от всякаго недуга прибегающыя с верою к тебе исцеляеши; радуйся, яко от лютаго насилия диавольскаго молящыяся к тебе изымаеши. Радуйся, присно всякое попечение о блазе владомых имевшая; радуйся, в скорбех и страданиях несчастным, сирым и бедным помощнице теплая. Радуйся, больных целительнице скорая и чудная; радуйся, ищущим пути ко спасению

наставнице благодатная. Радуйся, яко по преставлении твоем сподобилася еси от Бога дара чудотворений; радуйся, полки иноплеменных молением твоим от града Кашина отгнавшая.

Радуйся, святая благоверная княгине, преподобная мати Анно.

Кондак 7

Хотя Господь истинное благочестие твое явити и в терпении тя укрепити, скорби мнози попусти на тя, да просветишися, якоже злато в горниле, и да поеши Богу: Аллилуия.

Икос 7

Новаго страсотерпца яви Господь супруга твоего, благоверного князя Михаила: емуже сострадаючи, венцем от Бога венчалася еси, благоверная княгине, да прославляюще прославльшаго тя Господа, поем сице:

Радуйся, праведная Анно, носящая дух сокрушен к сильному и Богу разумов; радуйся, многия скорби и беды претерпевшая. Радуйся, молитвою вся побеждавшая; радуйся, терпением и упованием супруга твоего утешавшая. Радуйся, от единого Господа помощи ожидавшая; радуйся, к Нему милостивому с горькими слезами припадавшая. Радуйся, от Господа якоже злато в горниле скорбей очищенная; радуйся, якоже камень драгий чистотою сияющая. Радуйся, винограде, из точила приносяй вино благовонное; радуйся, манно, питающая и услаждающая всех требующих. Радуйся, источнице разума, от Бога разумов вся напаяй; радуйся, росо,

орошающая и оживляющая страну твою, от нашествия иноплеменных пострадавшую.

Радуйся, святая благоверная княгине, преподобная мати Анно.

Кондак 8

Странник в неверной стране явился благоверный супруг твой, всеблаженная Анно, егда завистию и клеветою сродник своих к безбожному царю ордынскому приведен бысть. Ты же скорбь сердца твоего покрывающи, излиха вопияла еси Богу: Аллилуия.

Икос 8

Весь еси желание мое, весь сладость, сладчайший Иисусе! Сице молящися Михаил, князь христолюбивый, и тако глаголаше: аще Бог соизволит, хощу ити сам во Орду ко беззаконному царю, хощу сам дати ответ и душу мою положить за овцы стада Христова по слову Его. Ты же, супружнице князя благочестиваго, вдохновенная благодатию свыше, рекла еси ему: поистине блажен будеши во вся роды. Сего ради вси приглашаху ти сице:

Радуйся, блаженная мати, в женском естестве мужескую крепость имевшая; радуйся, долготерпеливно упованием на Господа укреплявшаяся. Радуйся, глаголавшая князю: Господь будет твой помощник; радуйся, рекшая ему: за Господа пострадав, поистине блажен будеши. Радуйся, яко и сама уготовлялася еси пострадати за Спаса Христа; радуйся, спострадавшая супругу твоему в скорби мнозе. Радуйся, аще и не плотию,

обаче сердцем за Христа страдавшая; радуйся, токмо постом, молитвою и благодатию Божиею подкреплявшаяся. Радуйся, воплем крепким ко Господу взывавшая; радуйся, глаголавшая: изми нас, Господи, от человек лукавых, и от мужей неправедных, ополчавших брани, избави нас. Радуйся, супруга твоею презрети славу и всю сладость мира сего тленного увещевшая; радуйся, и нам крепкое упование подающая.

Радуйся, святая благоверная княгине, преподобная мати Анно.

Кондак 9

Все сердце твое содрогнуся, богомудрая, егда вестник печальную весть принесе, яко благоверный супруг твой Михаил во мнозех страданиях смерть мученическую претерпе: и абие в скорби велией, преклоньши колена, ко Отцу Небесному возстенала еси: буди воля Твоя. Ангели же, возносяще душу блаженнаго на небо, пояху: Аллилуия.

Икос 9

Ветии многовещании не возмогут изрещи скорби твоя и крепость любве твоя, егда со чады твоими текла еси во сретение мощей блаженнаго князя, супруга твоего. Темже и мы, ублажающе болезни сердца твоего, глаголем сице:

Радуйся, огненное искушение Господа ради претерпевшая; Радуйся, приобщитися страstem Христовым удостоившаяся. Радуйся, с верою и любовию понесшая крест твой и Христу последовавшая; радуйся, прелести мира сего спасения ради презревшая. Радуйся, яко и во

явление славы Его возрадуешься и восторжествуешь; радуйся, в бедах и скорбных обстояниях помощнице нам скорая. Радуйся, яко и сама в житии твоём Христа ради многоскорбна была еси; радуйся, душ смятенных умиротворительнице тихая. Радуйся, унывающим утешительнице дивная; радуйся, недоумеющим советнице мудрая. Радуйся, призывающим тя молитвеннице теплая. Радуйся, с верою и упованием умирающим поручнице крепкая.

Радуйся, святая благоверная княгине, преподобная мати Анно.

Кондак 10

Спасительнаго подвига ищущи, блаженная многоскорбная княгине Анно теплыми молитвами непрестанно Бога моляще, да не лишит ю достояния святых и наследия Небеснаго Своего Царствия, поющую Богу: Аллилуия.

Икос 10

Стена нерушимая, пристанище и предстательство к тебе прибегающих была еси, блаженная, утешение же и веселие. Сего ради зовем ти:

Радуйся, и во вдовстве бывшая правительнице мудрая, Ользе Святой подобная и милосердная; радуйся, чада твоя во страхе Божиим содержавшая. Радуйся, ходити в заповедях Господних и являти ко всем милость поучавшая; радуйся, блаженная, нищия питавшая и убогия призиравшая. Радуйся, странная в дом твой вводити повелевавшая, пищу и одежду им подававшая; радуйся, сирья и вдовицы заступавшая и всем просящим помощи помогавшая. Радуйся, много душею за чада твоя поболевшая;

радуйся, супружнице добляя. Радуйся, иноческое строго житие во вдовстве проводившая; радуйся, печальми земными угнетенным мир вечный раскрывающая. Радуйся, у Распятого на Кресте за ны, грешныя, мира и тишины непрестанно просившая; радуйся, в нынешнем житии всем помощнице теплая.

Радуйся, святая благоверная княгине, преподобная мати Анно.

Кондак 11

Пения и молитвы непрестанныя возносити Богу хотящи, блаженная, пришла еси во обитель девичу, и тамо с великим смирением молящися, повелела еси себе пострици во ангельский чин, и тако, помощию Всевышняго Бога, в мало времени превзошла еси добродетельми вся бывшая тамо постницы, поющи Господеви: Аллилуия.

Икос 11

Светоподательный светильник была еси, богоблаженная: князи бо, княгини, чада твоя и вся благочестне живущия во градех Твери и Кашине, обитель твою посещавшыя непрестанно поучала еси Бога боятися, Тому всегда угодна творити и жити в любви друг ко другу. Сего ради вси прославляху тя сице:

Радуйся, мирския суеты отрешившаяся; радуйся, Небеснаго Отечества возжелавшая. Радуйся, Христа всем сердцем возлюбившая; радуйся, к подножию ног Его присно припадавшая. Радуйся, великим ангельским образом украсившаяся. Радуйся, на иноческия подвиги и борения устремившаяся.

Радуйся, иноческому послушанию всецело предававшаяся; радуйся, всю себе в жертву непорочную принеся. Радуйся, ум и сердце твое молитве посвятившая; радуйся, яко Христос по успении твоём в чертог Свой ты всели. Радуйся, яко и мощи твоя нетленны сохрани, многими чудесы и исцеленьми к тебе приходящих обогати; радуйся, наставнице инокиням и собеседнице ангелом.

Радуйся, святая благоверная княгине, преподобная мати Анно.

Кондак 12

Благодать и велие дерзновение твое пред Богом ведуще, тебе, преподобная мати, молимся: молися о нас ко Господу, да избавит ны от всех бед и напастей и сохранит и утвердит ны во святей вере, во всяком благочестии и чистоте, да тихое и безмолвное житие поживем и поем благодееющему тобою Богу: Аллилуия.

Икос 12

Поюще твое прославление, ублажаем тя, преподобная, яко многомогущую о нас молитвенницу пред Господом, утешительницу и покровительницу, и возглашаем ти сице:

Радуйся: подвигом добрым подвизавшаяся; радуйся, течение скорбное постом, бдением и молитвою непрестанно совершавшая. Радуйся, носившая на земли венец терновый; радуйся, унаследовавшая на небеси венец нетленный. Радуйся, супружнице стратотерпца Христова; радуйся, с ним спострадавшая и венчавшаяся. Радуйся, молитвами твоими град Кашин от смертоносныя язвы

избавившая; радуйся, яко веру к тебе несумненную и надежду известную в любящих тя възгрела еси. Радуйся, от Господа всех благих нам подательнице; радуйся, во всех скорбех и обстояниих утешительнице. Радуйся, от враг видимых и невидимых защитнице; радуйся, о нас пред Господем в день праведнаго воздаяния предстательнице.

Радуйся, святая благоверная княгине, преподобная мати Анно.

Кондак 13

О преподобная и преблаженная мати Анно! Молися присно Христу Богу нашему даровати и миру умирение, и всей Российстей земли великое утверждение, нам же грехов оставление и жития исправление, да тако Небеснаго Царствия наследницы будем, в радости поюще со ангелы Богу: Аллилуия, Аллилуия, Аллилуия.

(Этот кондак читается трижды, затем икос 1 и кондак 1)

Икос 1

Ангелов Творец честную отрасль благочестиваго корене благоверных российских князей избра тя во образ всем, сияющую верою, любовью, чистотою, да вси, зряще твое богоугодное житие, со благоговением и радостию глаголют ти сице:

Радуйся, яко от младенчества благодати Божия исполнилася еси; радуйся, яко в житии твоём добродетельми многими просветилася еси. Радуйся, правило веры и благочестия; радуйся, образе кротости и смирения. Радуйся, светило любве и воздержания. Радуйся, даров Святаго Духа честное вместилище. Радуйся, скорбных утешение; радуйся,

княгинь и инокинь Российских похваление. Радуйся, живущих в мире тихое пристанище; радуйся, благочестивых родителей утешение. Радуйся, градов Твери и Кашина и вся земля наша украшение; радуйся, ныне с лики ангельскими на небесех Владыце всех предстоящая.

Радуйся, святая благоверная княгине, преподобная мати Анно.

Кондак 1

Избранной и предивней угоднице Христове, скорой помощнице и молитвеннице нашей, похвальная воспеваем ти, о нас пред Христом Богом предстательнице. Ты же яко имущая велие дерзновение ко Господу, молися, да избавит от бед и скорбей ны зовущия:

Радуйся, святая благоверная княгине, преподобная мати Анно.

Молитва

О преподобная и преблаженная мати Анно! Смиренно припадающе к раце честных мощей твоих, молимся со слезами прилежно: не забуди убогих твоих до конца, но поминай нас всегда во святых твоих и благоприятных молитвах к Богу. О преблаженная великая княгине Анно! Не забуди присещати чад твоих: аще бо телом и преставилася еси от нас, но и по смерти жива пребываеши, и не отступаеши от нас духом, сохраняюще нас от стрел вражиих, всякия прелести бесовския и козней диавольских. Молитвеннице наша усердная! Не престай молящися за ны ко Христу, Богу нашему: аще бо мощей твоих рака пред очима нашими выну

видима есть, но святая душа твоя, со Ангельскими воинствы у престола Вседержителя предстоящи, достойно веселится. К тебе убо припадаем, тебе молимся, тебе мили ся деем: молися, преблаженная Анно, Всемилостивому Богу нашему о спасении душ наших, еже испросити нам время на покаяние и невозбранно прейти от земли на Небо, мытарств горьких и вечныя муки избавитися и Небесному Царствию наследником быти со всеми преподобными, от века угодившими Господу нашему Иисусу Христу, Емуже слава, со Безначальным Его Отцем, и с Пресвятым, и Благим, и Животворящим Его Духом, ныне, и присно, и во веки веков. Аминь.